

Na osnovu člana 4.2, 4.3 i 7, Zakona o prijenosu, regulatoru i operateru sistema električne energije u Bosni i Hercegovini ("Službeni glasnik BiH", br. 7/02 i 13/03), člana 14. Statuta Državne regulatorne komisije za električnu energiju ("Službeni glasnik BiH", br. 41/03 i 59/04) i člana 50. Poslovnika o radu Državne regulatorne komisije za električnu energiju ("Službeni glasnik BiH", broj 2/05), na sjednici Državne regulatorne komisije za električnu energiju, održanoj dana 21. aprila 2005. godine, donijet je

PRAVILNIK O LICENCAMA

I OPĆE ODREDBE

Član 1.

Predmet pravilnika

Ovim pravilnikom se definiše procedura i kriteriji za izdavanje licenci od strane DERK-a, uključujući proceduru podnošenja zahtjeva, pregleda zahtjeva i izdavanja licenci, kao i rokove za odlučivanje o zahtjevu, a takođe i suštinske kriterije za odobravanje ili odbijanje zahtjeva za dodjelu licence i sadržaj i uvjete licence.

Pravilnikom se definiše i način izmjene, suspenzije i ukidanja licence, kao i postupci kod prodaje, dodjeljivanja, iznajmljivanja ili prijenosa licence na neki drugi način.

Postupak izdavanja licence je javan i vodi se u skladu sa objektivnim i javnosti poznatim kriterijima na nediskriminirajući i transparentan način.

Član 2.

Definicije

Definicije termina koji se koriste u ovom pravilniku, uključujući i one iz Zakona i Poslovnika o radu DERK-a su sljedeće:

‘**DERK**’ označava Državnu regulatornu komisiju za električnu energiju,

‘**FERK**’ označava Regulatornu komisiju za električnu energiju u Federaciji Bosne i Hercegovine,

‘**REERS**’ označava Regulatornu komisiju za električnu energiju Republike Srpske,

‘**NOS**’ označava Nezavisnog operatera sistema za upravljanje radom prijenosnog sistema u Bosni i Hercegovini,

‘**Prijenos**’ označava transport električne energije preko visokonaponskog povezanog sistema za isporuku krajnjim korisnicima, distribucijama i susjednim elektroenergetskim sistemima,

‘**Licenca**’ označava dokument izdat od strane DERK-a koji licu kome je izdata daje ovlaštenje da obavlja djelatnost specificiranu u licenci pod uvjetima propisanim u uvjetima za korištenje licence,

‘**Pravilnik o javnim raspravama**’ označava pravilnik DERK-a po kome se vode javne rasprave,

‘**Kvalifikovani kupac**’ označava kupca koji je slobodan da kupuje električnu energiju od snabdjevača po svom izboru u skladu sa zakonom,

‘**Međunarodna trgovina**’ označava kupovinu, prodaju ili isporuku električne energije gdje je jedno od mjesta kupovine, prodaje ili isporuke van Bosne i Hercegovine,

- 'Kupovina električne energije za vlastite potrebe'** označava kupovinu električne energije na tržištu od strane kvalifikovanog kupca za potrebe potrošnje u objektima na osnovu koje je dobio takav status,
- 'Javna usluga'** označava uslugu dostupnu u svako vrijeme svim kupcima i energetskim subjektima po regulisanoj cijeni i prema regulisanim uvjetima pristupa i korištenja usluge, uvažavajući sigurnost, regularnost i kvalitet usluge, zaštitu okoline, efikasnost korištenja energije i zaštitu klime, a koja se obavlja prema načelima javnosti rada i nadzora tijela određenih zakonom,
- 'Poslovnik o radu DERK-a'** označava Poslovnik o radu Državne regulatorne komisije za električnu energiju,
- 'Vlasnik licence'** označava lice koje posjeduje jednu od licenci definiranih u članu 4. ovog pravilnika,
- 'Lice'** označava fizičko ili pravno lice bilo kojeg oblika svojine i organiziranja,
- 'Zakon'** označava Zakon o prijenosu, regulatoru i operateru sistema električne energije u Bosni i Hercegovini ("Službeni glasnik BiH", br. 7/02 i 13/03),
- 'Zakon o osnivanju prijenosa'** označava Zakon o osnivanju Kompanije za prijenos električne energije u Bosni i Hercegovini ("Službeni glasnik BiH", broj 35/04),
- 'Zakon o osnivanju NOS-a'** označava Zakon o osnivanju Nezavisnog operatera sistema za prijenosni sistem u Bosni i Hercegovini ("Službeni glasnik BiH", broj 35/04),
- 'Podnosilac zahtjeva'** označava lice koje podnosi zahtjev za izdavanje licence u skladu sa ovim pravilnikom i Zakonom,
- 'Javna rasprava'** označava bilo koju raspravu organiziranu od strane DERK-a, otvorenu za prisustvo javnosti, a koja može biti opća, formalna ili tehnička rasprava.

Član 3.

Licenciranje

Ni jedno pravno ili fizičko lice ne smije obavljati aktivnosti prijenosa električne energije, nezavisnog operatera sistema, međunarodne trgovine električnom energijom ili druge aktivnosti vezane za prijenos električne energije za koje je, prema Zakonu i ovom pravilniku, potrebna licenca, bez licence koja je izdata prema ovom pravilniku.

DERK će razmotriti zahtjev za izdavanje licence u skladu sa kriterijima navedenim u Zakonu i ovom pravilniku. U tumačenju ovih kriterija, DERK će djelovati u pravcu stvaranja uvjeta za neograničenu i slobodnu trgovinu i kontinuirano snabdijevanje električnom energijom po definiranom standardu kvaliteta za dobrobit građana BiH, i kreiranja tržišta električne energije. U tom cilju DERK može uzeti u obzir sve relevantne direktive Evropske unije i sporazume o električnoj energiji pri tumačenju ovih kriterija.

Podnosilac zahtjeva za licencu ima obavezu da dokaže da ispunjava sve kriterije za izdavanje licence i da poštuje sve standarde licence.

DERK će u licencu uključiti sve uvjete koji su neophodni za osiguranje ciljeva Zakona, ovog pravilnika i drugih dokumenata DERK-a.

Član 4.

Vrste licenci

DERK iz svoje nadležnosti izdaje sljedeće licence:

- a) Licenca za prijenos električne energije,
- b) Licenca za aktivnosti Nezavisnog operatera sistema,
- c) Licenca za međunarodnu trgovinu.

Član 5. **Period važenja licenci**

Licenca se izdaje na određeni vremenski period, ne kraći od 5 i ne duži od 40 godina.

Podnosilac zahtjeva u svom zahtjevu može da navede za koji vremenski period traži licencu.

O periodu na koji se licenca izdaje odlučuje DERK, a prilikom odlučivanja o vremenu trajanja licence, pored izražene želje podnosioca zahtjeva, koristit će se i sljedećim, ali ne i obavezujućim, normama:

- | | |
|--|------------|
| - licenca za prijenos električne energije | 25 godina, |
| - licenca za aktivnosti Nezavisnog operatera sistema | 7 godina, |
| - licenca za međunarodnu trgovinu | 5 godina. |

Prije izdavanja prvih licenci DERK može izdati privremenu licencu kako bi se omogućilo prikupljanje podataka neophodnih za konačnu odluku o licenci u skladu sa članom 38. ovog pravilnika.

DERK može prve licence izdati na minimalni Zakonom predviđen rok.

DERK može u uvjete dozvole uključiti i uvjete koji omogućavaju DERK-u da produži period važenja licence unilateralno i da naloži vlasniku licence da, uprkos isticanju licence, nastavi pružati kompenzirane usluge na privremenom osnovu, ako se za to pojavi potreba.

II PROCEDURE ZA PODNOŠENJE ZAHTJEVA ZA LICENCE

Član 6. **Podnosilac zahtjeva**

Podnosilac zahtjeva za izdavanje licence može biti:

- a) za licencu za prijenos električne energije – "Elektroprijenos BiH" uspostavljen na osnovu Zakona o prijenosu regulatoru i operateru sistema električne energije u BiH ("Službeni glasnik BiH", br. 7/02 i 13/03) i Zakona o osnivanju Kompanije za prijenos električne energije u BiH ("Službeni glasnik BiH", broj 35/04),
- b) za licencu za aktivnosti Nezavisnog operatera sistema – "Nezavisni operater sistema" uspostavljen na osnovu Zakona o prijenosu regulatoru i operateru sistema električne energije u BiH ("Službeni glasnik BiH", br. 7/02 i 13/03) i Zakona o osnivanju Nezavisnog operatera sistema za prijenosni sistem u BiH ("Službeni glasnik BiH", broj 35/04), i
- c) za licencu za međunarodnu trgovinu - sva lica registrirana za obavljanje poslova trgovine električnom energijom, ako ispunjavaju uvjete za bavljenje međunarodnom trgovinom predviđene zakonom i ovim pravilnikom.

DERK može uspostaviti pojednostavljenu proceduru izdavanja licence za međunarodnu trgovinu za podnosioca zahtjeva u statusu kvalifikovanog kupca neposredno spojenog na prijenosnu mrežu koji traže da uvoze električnu energiju ekskluzivno za svoje vlastite potrebe. Ako DERK uspostavi takvu proceduru, kvalifikovani kupci mogu podnijeti zahtjev za izdavanje licence u skladu sa tom procedurom.

Član 7.

Podnošenje zahtjeva

Podnosilac zahtjeva je dužan dostaviti zahtjev na način, u formi i na obrascima definiranim od strane DERK-a.

Obrasci zahtjeva mogu se preuzeti u sjedištu ili na web stranici DERK-a.

Zahtjev sa priložima se podnosi u pisanoj formi, ovjeren i potpisan od strane podnosioca zahtjeva, a dostavlja se poštom, ličnom dostavom ili na drugi adekvatan način. Svi dokumenti iz zahtjeva se dostavljaju i u elektronskoj formi propisanoj od strane DERK-a. Uz zahtjev je potrebno priložiti i izjavu da dokumenti dostavljeni u elektronskoj formi u potpunosti odgovaraju dostavljenim originalima.

Podnosilac uz zahtjev prilaže dokaz o uplati naknade za podnošenje zahtjeva definirane posebnom odlukom DERK-a.

Podnosilac je obavezan potpisati izjavu o prihvatanju obaveza plaćanja regulatorne naknade, kao i izjavu datu pod punom materijalnom i krivičnom odgovornošću da su svi podaci dostavljeni DERK-u istiniti i tačni.

DERK razmatra zahtjev za licencu samo ukoliko je zahtjev kompletan i ukoliko sadrži dokaze navedene u prethodnom stavu.

Ako podnosilac zahtjeva namjerava da se bavi sa više djelatnosti za koje je potrebna licenca, dužan je za svaku djelatnost podnijeti poseban zahtjev.

Član 8.

Kompletnost zahtjeva

DERK će najkasnije u roku od 30 dana od dana prijema zahtjeva utvrditi da li je zahtjev kompletiran u skladu sa propisanom procedurom.

Nakon pregleda zahtjeva, DERK dostavlja podnosiocu pisana obavijest o tome da li je zahtjev kompletan ili je nepotpun.

U slučaju da zahtjev nije kompletan, DERK će, u pomenutom obavještenju, navesti njegove nedostatke.

Član 9.

Zahtjevi za dodatnim informacijama

U postupku utvrđivanja činjenica o ispunjavanju uvjeta propisanih za izdavanje licence, DERK ima pravo provjeriti sve podatke, te po potrebi izvršiti pregled objekata, postrojenja i opreme, dokumentacije, kao i tražiti dodatne informacije u bilo kojem trenutku od momenta podnošenja zahtjeva do donošenja konačne odluke o zahtjevu, kao i u periodu važenja licence.

Podnosilac zahtjeva je dužan dostavljati podatke i informacije iz prethodnog stava u rokovima koje odredi DERK i saradivati sa DERK-om.

III OBRADA ZAHTJEVA I DONOŠENJE ODLUKE

Član 10.

Objava zahtjeva

Nakon što je zahtjev zaprimljen kao potpun, DERK objavljuje kratku obavijest za javnost u pisanim medijima i svojoj web stranici, sumirajući zahtjev za licencu.

Obavijest sadrži i način na koji zainteresirana lica mogu dobiti informacije i upute zainteresiranim licima da mogu podnijeti komentare u pisanoj formi na zahtjev za licencu prije završetka roka za podnošenje komentara označenog u sažetku.

Javnost može dostaviti svoje komentare u pisanoj formi na adresu DERK-a i to u roku od 15 dana od dana objavljivanja obavještenja za javnost.

Obavijest za javnost sadrži i kriterije za sticanje statusa umješača, informaciju kad i kako se mogu podnijeti zahtjevi za sticanje statusa umješača i upozorenje da jedino podnosilac zahtjeva i umješač može učestvovati na raspravama u toku postupaka vezanih za licence.

Član 11.

Uloga i odgovornost umješača

DERK može dodijeliti status umješača licu koje dokaže direktan interes za postupak izdavanja licence, koji je drugačiji od općeg javnog interesa za izdavanje licence. U određenim slučajevima, DERK može ograničiti obim učešća umješača u skladu sa njegovim demonstriranim interesom.

U slučaju iz prethodnog stava, umješaču se dozvoljava da učestvuje u postupku, svjedoči i zahtjeva informacije od podnosioca zahtjeva putem DERK-a.

Pisane ili usmene izjave umješača na raspravama za izdavanje licenci moraju se dati pod punom krivičnom i materijalnom odgovornošću za tačnost i ispravnost datih podataka.

Član 12.

Saradnja sa drugim regulatornim komisijama

DERK će razmjenjivati potrebne informacije sa FERK-om i REERS-om o podnesenim zahtjevima za licence i odlukama o istim, kao i pitanjima monitoringa i provođenja licenci.

Član 13.

Priprema nacrt licence

Nakon postupka provjere kompletnosti zahtjeva iz člana 8. ovog pravilnika, DERK provjerava tačnost podataka, dokumenata ili informacija priloženih uz zahtjev.

Na osnovu obrade zahtjeva iz prethodnog stava i nakon ocjene komentara javnosti na sažetak zahtjeva za licencu, DERK će preporučiti da li je potrebno održati javnu raspravu prije pripreme preporuke po pitanju nacrt licence ili prijedloga da se licenca ne izda. Ako DERK odluči da ne treba da se održi javna rasprava, DERK će pripremiti nacrt licence ili prijedlog da se licenca ne izda.

Član 14.

Javna rasprava

DERK može voditi opću raspravu, formalnu raspravu i tehničku raspravu u skladu sa Poslovníkom o radu DERK-a.

DERK će odrediti vrstu rasprave.

DERK će objaviti obavijest za javnost o javnoj raspravi po pitanju licenci i pozvati zainteresirane strane da daju komentare na nacrt licence najkasnije pet (5) radnih dana prije javne rasprave.

Član 15.

Formalna rasprava

Formalna rasprava će se održati samo kad je potrebno riješiti sporna zakonska ili druga pitanja.

Rasprava će se voditi u skladu sa Pravilnikom o javnim raspravama.

Član 16.

Donošenje odluka

Nakon okončanja rasprave, priprema se prijedlog odluke po zahtjevu za izdavanje licence uz koji se prilažu svi prateći dokumenti.

Kopija prijedloga odluke po zahtjevu za izdavanje licence dostavlja se podnosiocu zahtjeva i umješaću. Podnosilac zahtjeva i umješać daju svoj komentar u roku od osam (8) dana.

Na internom sastanku, a po završetku roka za prijem komentara javnosti, podnosioca zahtjeva i umješaća, Komisija raspravlja o prijedlogu odluke.

Odluka DERK-a o zahtjevu za izdavanje licence se donosi na redovnoj sjednici Komisije.

Rok za donošenje konačne odluke po zahtjevu za izdavanje licence zavisi od složenosti zahtjeva, ali će DERK nastojati da se odluka donese na što efikasniji način.

Odluka po zahtjevu za izdavanje licence, kao i sama licenca, ako nije određen drugi rok, stupaju na snagu danom donošenja, a odluka se objavljuje u "Službenom glasniku BiH", službenim glasilima entiteta i web stranici DERK-a.

Istovremeno, odluka DERK-a po zahtjevu za izdavanje licence se dostavlja podnosiocu zahtjeva i umješaću.

Član 17.

Regulatorna naknada

Iznos regulatorne naknade i naknade za podnošenje zahtjeva po vrstama licenci utvrđuje se posebnom odlukom DERK-a.

Naknada za podnošenje zahtjeva se uplaćuje prije podnošenja zahtjeva za izdavanje licence, a dokaz o uplati prilaže se uz zahtjev.

Regulatorna naknada se plaća tokom trajanja licence, kao i u slučaju produženja licence iz člana 5. stav 6. ovog pravilnika.

IV DOSTAVLJANJE PODATAKA

Član 18.

Potrebni dokumenti

Zahtjev za izdavanje licence se podnosi na obrascu propisanom od strane DERK-a, a uz zahtjev se obavezno prilažu sljedeći dokumenti:

1. Izvod iz nadležnog registra pravnih lica,
2. Matični i poreski broj,
3. Statut,
4. Organizacijska struktura,

5. Kvalifikacijska struktura zaposlenih ili konsultanata sa obrazloženjem njihovih tehničkih kvalifikacija za provođenje licencirane aktivnosti,
6. Spisak rukovodećeg kadra ili konsultanata sa obrazloženjem njihovih tehničkih kvalifikacija za provođenje licencirane aktivnosti,
7. Revidirani finansijski izvještaji o završnom računu za prethodne tri godine za postojeće firme ili početni bilans stanja za novoformirane firme,
8. Poslovni plan za naredne tri godine,
9. Popis stalnih sredstava po amortizacijskim grupama i zadnjim godišnjim obračunom amortizacije,
10. Uvjerenje nadležnog suda da nije pokrenut stečajni ili likvidacioni postupak nad podnosiocem zahtjeva,
11. Izjava o svim otvorenim transakcijskim računima kod komercijalnih banaka i bankarska potvrda njihovog statusa (bankarska potvrda statusa podrazumijeva obim prometa na računu u zadnjih mjesec dana kao i pokazatelje o eventualnim blokadama na računima),
12. Certifikat nezavisne kuće za akreditiranje o sistemu osiguranja kvaliteta ili plan i vremenski raspored aktivnosti na uvođenju takvog sistema,
13. Izjava o statusu usklađenosti sa svim propisima vezanim za zaštitu okoline i provođenju istih,
14. Dokaz o uplati naknade za podnošenje zahtjeva,
15. Dokaz o izmirenju ranijih regulatornih naknada ako je podnosilac posjedovao licencu izdatu od strane DERK-a,
16. Izjavu o postojećim izdatim licencama ili zahtjevima za licence podnesenim FERK-u ili REERS-u, kao i bilo kojem drugom regulatornom tijelu van BiH,
17. Izjavu o prihvatanju plaćanja regulatorne naknade prema odlukama DERK-a, i
18. Bilo koju drugu informaciju koju DERK smatra, u bilo kojem stepenu postupka, potrebnom za donošenje odluke.

Svi dokazi se prilažu u originalu ili u ovjerenjima, s tim da potvrde i izjave ne smiju biti starije od 60 dana.

Član 19.

Dodatni dokumenti za pojedine licence

a) Licence za prijenos električne energije

Uz zahtjev za izdavanje licence za prijenos električne energije, pored dokumenata navedenih u članu 18. ovog pravilnika, obavezno se prilažu sljedeći dokumenti:

1. Tehnički podaci o mreži i postrojenjima u vlasništvu podnosioca zahtjeva koji se koriste u svrhu obavljanja djelatnosti prijenosa električne energije sa podacima o upotrebim dozvolama za iste,
2. Tehnički podaci o mreži i postrojenjima koja nisu u vlasništvu podnosioca zahtjeva, a koriste se u svrhu obavljanja djelatnosti prijenosa električne energije sa detaljima o vlasništvu nad pomenutim sredstvima,
3. Situaciona karta i blok-funkcionalna šema prijenosne elektroenergetske mreže,

4. Specifikacija i tehničke karakteristike mjernih uređaja na mjestima preuzimanja/iskoruke električne energije,
5. Lista komunikacijskih sredstava koja služe za obavljanje osnovne djelatnosti podnosioca zahtjeva sa naznačenim vlasništvom nad tim sredstvima,
6. Plan izgradnje novih i značajnije rekonstrukcije postojećih objekata za naredne tri godine,
7. Izvod ili skraćenu verziju Plana održavanja elektroenergetskih objekata za naredne tri godine,
8. Pregled kupaca direktno priključenih na prijenosnu mrežu sa potrošnjom u zadnje tri godine,
9. Pregled održavanja objekata u zadnje tri godine,
10. Pregled načina nadzora pripadajuće prijenosne mreže i pregled načina upravljanja određenih visokonaponskih prijenosnih uređaja od kojih se ne zahtijeva omogućavanje slobodnog protoka električne energije iz značajnih energetske izvora preko međusobno povezane prijenosne mreže, a koje je NOS eventualno dodijelio podnosiocu zahtjeva na upravljanje,
11. Spisak i opis funkcija softvera neophodnog za obavljanje osnovne djelatnosti kojim raspolaže podnosilac zahtjeva, i
12. Izjava o sposobnosti i spremnosti zadovoljavanja obaveza koje se odnose na javnu uslugu.

b) Licence za aktivnosti nezavisnog operatera sistema

Uz zahtjev za izdavanje licence za aktivnosti nezavisnog operatera sistema, pored dokumenata navedenih u članu 18. ovog pravilnika, obavezno se prilažu sljedeći dokumenti:

1. Metodologija i kriteriji upravljanja mrežom sa funkcionalnom šemom aktivnosti,
2. Lista komunikacijskih sredstava koja služe za obavljanje osnovne djelatnosti podnosioca zahtjeva sa naznačenim vlasništvom nad tim sredstvima,
3. Spisak i opis funkcija softvera neophodnog za obavljanje osnovne djelatnosti kojim raspolaže podnosilac zahtjeva,
4. Pregled i vremenski plan donošenja tehničkih i komercijalnih pravila potrebnih za obavljanje djelatnosti NOS-a,
5. Pregled i vremenski plan potpisivanja ugovora sa drugim subjektima u BiH ili inostranstvu neophodnih za obavljanje djelatnosti NOS-a,
6. Pregled i kratak prikaz međunarodnih organizacija u kojima podnosilac zahtjeva želi da participira ili ima obavezu da participira, i
7. Izjava o sposobnosti i spremnosti zadovoljavanja obaveza koje se odnose na javnu uslugu.

c) Licence za međunarodnu trgovinu

Uz zahtjev za izdavanje licence za međunarodnu trgovinu, pored dokumenata navedenih u članu 18. ovog pravilnika, obavezno se prilažu sljedeći dokumenti:

1. Postojeća licenca za trgovinu, proizvodnju ili snabdijevanje izdatu od strane FERK-a ili REERS-a, ako je podnosilac zahtjeva već učesnik domaćeg tržišta električne energije ili dokaz da će podnosilac zahtjeva dobiti takvu licencu prije otpočinjanja djelatnosti međunarodne trgovine u skladu sa licencom DERK-a,

2. Dokaz o solventnosti podnosioca zahtjeva,
3. Dokaz o vlasničkom kapitalu podnosioca zahtjeva sa pregledom vlasnika ili akcionara/dioničara sa učešćem većim od 5%,
4. Izjava poslovne banke ili druge organizacije o spremnosti da izda finansijsku garanciju ili garanciju o izvršenju na iznos planirane ili ugovorene transakcije (podobnost garanta i kvalitet garancije ocjenjuje DERK), i
5. Informacija podnosioca zahtjeva o drugim tržištima električne energije van BiH na kojima posluje sa nazivom i podacima za kontakt regulatornih tijela nadležnih na tim tržištima, (ukoliko podnosilac zahtjeva obavlja i aktivnosti u inostranstvu).

Član 20.

Povjerljive informacije

Strane uključene u postupak izdavanja licence čuvat će povjerljivost svih traženih podataka i informacija koje se smatraju poslovnom tajnom ili povjerljivim, osim u mjeri u kojoj zakon predviđa da se takvi podaci objave.

DERK će odrediti da li povjerljive informacije, podnesene od strane podnosioca zahtjeva kao dio zahtjeva, trebaju biti dostupne drugim stranama.

Podaci dobijeni prilikom podnošenja zahtjeva za licencu mogu se koristiti samo u svrhu izdavanja i praćenja licence.

Svaka strana koja dobije pristup podacima ili informacijama za koje zna da su povjerljive prirode, ima obavezu da štiti povjerljivost tih podataka ili informacija, osim u slučajevima kada se prema zakonu zahtjeva dostava tih podataka ili informacija.

DERK će pravila o postupanju sa povjerljivim informacijama utvrditi posebnim pravilnikom.

V KRITERIJI ZA IZDAVANJE LICENCE

Član 21.

Opći kriteriji

Opći kriteriji za donošenje odluke o izdavanju licence, u skladu Zakonom, između ostalog će se bazirati na:

- a) bezbjednosti elektroprijenosne mreže, instalacija i pripadajuće opreme,
- b) zaštiti javnog zdravstva i bezbjednosti,
- c) zaštiti okoline,
- d) korištenju zemljišta i lokacija,
- e) korištenju javne imovine,
- f) energetske efikasnosti,
- g) kriterijima koji se posebno odnose na podnosioca zahtjeva, kao što su tehničke, ekonomske i finansijske sposobnosti, i
- h) sposobnosti i spremnosti da se zadovolje sve obaveze koje se odnose na javnu uslugu.

DERK će smatrati da su kriteriji iz stava 1. ovog člana, kao i drugi kriteriji ispunjeni ako podnosilac zahtjeva dokaže:

1. da ispunjava uvjete bezbjednosti tako što predoči da svi njegovi objekti, postrojenja i aktivnosti posjeduju potrebne dozvole i zadovoljavaju sve primjenljive standarde,
2. da je priložio izjavu o usklađenosti normativnih akata sa svim propisima vezanim za zaštitu okoline i provođenju istih, kao i da ispunjava sve uspostavljene kriterije za zaštitu okoline i vrši stalnu kontrolu nad utjecajem na okolinu,
3. da se javna imovina, uključujući i zemljište, koristi sa dužnom pažnjom i u obimu u kome je izdato ovlaštenje za korištenje takve imovine i zemljišta, kao i da je podnosilac zahtjeva dokazao kako posjeduje odgovarajuća prava i ovlaštenja za korištenje privatne imovine uključene u izgradnju,
4. da je svoje aktivnosti prilagodio svim propisima vezanim za energetska efikasnost,
5. da ispunjava sve primjenljive tehničke kriterije za objekte, postrojenja, uređaje i opremu za obavljanje djelatnosti koje posjeduje ili koristi,
6. da je pokazao finansijsku sposobnost i/ili obezbjedio odgovarajuće finansijske garancije za izvršenje kako bi obezbjedio ispunjenje svih uvjeta za korištenje licence,
7. da ima dovoljno zaposlenih sa odgovarajućom stručnom kvalifikacijom za obavljanje djelatnosti,
8. da organizacijska struktura podnosioca zahtjeva obezbjeđuje kvalitetno izvršenje licencirane djelatnosti,
9. da je priložio izjavu o sposobnosti i spremnosti zadovoljavanja svih obaveza koje se odnose na javnu uslugu,
10. da nije imao slučaj ukidanja licence istog tipa za poslednjih deset godina prije podnošenja zahtjeva za licencu od bilo koje regulatorne institucije,
11. da se podnosilac zahtjeva ili član njegove uprave ne vode u kaznenoj evidenciji,
12. da je sposoban da obezbijedi računovodstvene izvještaje u formi i sa detaljima koje zatraži DERK, i
13. da je spreman da se pridržava svih predloženih uvjeta licence koji će biti uključeni u licencu.

Član 22.

Specifični kriteriji

Pored općih kriterija za izdavanje licence iz prethodnog člana, podnosilac zahtjeva za određenu vrstu licence treba da zadovolji i specifične kriterije vezane za licencu za koju podnosi zahtjev.

a) Licence za prijenos električne energije

Kriteriji specifični za licencu za aktivnosti prijenosa električne energije su:

- korištenje elektroenergetske mreže odgovarajućih karakteristika za bezbjedan i pouzdan prijenos električne energije,
- posjedovanje i provođenje plana redovnog održavanja svojih objekata, i
- dokazana finansijska i tehnička sposobnost za demontažu i/ili uklanjanje svih objekata u skladu sa tehničkim zahtjevima okoline, nakon isteka roka važenja licence, a u slučajevima navedenim u licenci.

b) Licence za aktivnosti nezavisnog operatera sistema

Kriterij specifičan za licencu za aktivnosti NOS-a je:

- mogućnost adekvatnog vršenja funkcije nezavisnog operatera sistema u skladu sa zakonom.

c) Licence za međunarodnu trgovinu

Kriteriji specifični za licencu za međunarodnu trgovinu su:

- podnosilac zahtjeva nije kažnjavan za prijevaru, finansijsku neodgovornost ili značajno kršenje licenci na tržištima električne energije u i van BiH,
- dokazana mogućnost pribavljanja odgovarajućih finansijskih garancija i garancija za izvršenje svoje poslovne aktivnosti,
- podnosilac zahtjeva je dao izjavu da će se pridržavati tržišnih pravila,
- upisani kapital u iznosu od najmanje jedan (1) milion KM, i
- podnosilac zahtjeva je pokazao da će dobiti odgovarajuću licencu za trgovinu od strane FERK-a ili REERS-a prije otpočinjanja djelatnosti međunarodne trgovine u skladu sa licencom DERK-a.

Član 23.

Razlozi za odbijanje zahtjeva za licencu

Podnosiocu neće biti izdata dozvola u sljedećim slučajevima:

- ukoliko je zahtjev nepotpun, a zahtijevani podaci nisu dostavljeni ni nakon završetka roka za dostavljanje kompletiranog zahtjeva,
- ukoliko podnosilac zahtjeva ne uspije da dokaže da ispunjava kriterije za izdavanje licence,
- ukoliko dostavljeni podaci o finansijskim i tehničkim kapacitetima ne predstavljaju dovoljnu garanciju da će podnosilac zahtjeva na odgovarajući način obavljati traženu djelatnost,
- ukoliko je podnosilac zahtjeva kažnjavan za prijevaru, finansijsku neodgovornost ili značajno kršenje licenci na tržištima električne energije u i van BiH,
- ukoliko je podnosiocu zahtjeva ili bilo kom od članova uprave podnosioca zahtjeva izrečena zabrana obavljanja djelatnosti u skladu sa zakonom,
- ukoliko podnosilac zahtjeva ne pokaže da zadovoljava sve licencne kriterije i uvjete za koje DERK smatra da su neophodni za provođenje ciljeva Zakona,
- ukoliko prethodna evidencija o licencama podnosioca zahtjeva ne opravdava obnavljanje licence,
- ukoliko podnosilac zahtjeva nije dostavio DERK-u tražene podatke koji se odnose na prethodno izdatu licencu, u slučaju produženja licence,
- ukoliko podnosilac zahtjeva nije platio naknadu za podnošenje zahtjeva ili regulatornu naknadu DERK-a za prethodno izdatu licencu, i
- ukoliko je nad podnosiocem zahtjeva pokrenut postupak stečaja ili likvidacije.

VI FORMA I SADRŽAJ LICENCE

Član 24.

Forma licence

Licenca se izdaje u formi definiranoj od strane DERK-a.

Sastavni dio licence su Uvjeti za korištenje licence.

Član 25.

Sadržaj licence

Licenca će sadržavati sljedeće informacije:

- djelatnost za koju se licenca izdaje,
- registarski broj licence,
- datum izdavanja licence,
- naziv i adresu sjedišta vlasnika licence,
- matični broj vlasnika licence, i
- vremenski period za koji se licenca izdaje.

Član 26.

Sadržaj uvjeta za korištenje licence

Uvjeti za korištenje licence će sadržavati, ali se neće ograničiti na:

- zahtjev da vlasnik licence permanentno radi na ispunjavanju uvjeta predviđenih čl. 21. i 22. ovog pravilnika,
- mogućnost otvaranja procesa redefiniranja licence tokom perioda njenog važenja, na zahtjev vlasnika licence ili na osnovu vlastite inicijative DERK-a kako bi se promijenili uvjeti licence zbog značajnijih promjena u zakonu ili činjeničnim okolnostima,
- obavezu stalnog dokazivanja finansijskog integriteta i stabilnosti,
- odredbe o obavezi poštivanja propisa iz oblasti međunarodne trgovine, praćenja promjena međunarodnih tehničkih zahtjeva vezanih za trgovinu električnom energijom i usklađivanja poslovanja sa tim promjenama,
- odredbe o kvalitetu usluga,
- način rješavanja sporova,
- zahtjev za uspostavljanje kodeksa ponašanja i obavezu pridržavanja tog kodeksa,
- obaveze vezane za računovodstvene standarde,
- obavezu zaštite potrošača kojom se obezbjeđuje pravičan i ravnopravan tretman, visokokvalitetne usluge, konkurencija i spriječavanje antikonkurentnih aktivnosti,
- obavezu poštivanja mrežnog kodeksa i tržišnih pravila,
- principe kontrole i nadzora obavljanja licencirane aktivnosti od strane DERK-a,
- obavezu redovnog dostavljanja podataka DERK-u, na način i u formi koju propiše DERK,
- obavezu dostavljanja podataka po posebnom zahtjevu DERK-a,

- obavezu provođenja javne usluge kako bi se obezbijedilo kontinuirano snabdijevanje električnom energijom za kvalifikovane i nekvalifikovane (tarifne) kupce i
- bilo koji drugi uvjet ili zahtjev koji DERK smatra važnim, kako bi se ispunili ciljevi zakona i regulative DERK-a.

Član 27.

Sadržaj uvjeta za korištenje licence specifičan za pojedine licence

Licenca za prijenos električne energije i licenca za aktivnosti Nezavisnog operatera sistema će sadržavati uvjete koji će omogućiti konkurentnim snabdjevačima električnom energijom pristup prijenosnom sistemu i obezbijediti ispunjavanje uvjeta iz zakona i propisa DERK-a.

a) Licence za prijenos električne energije

Pored sadržaja iz člana 26. ovog pravilnika, uvjeti za licencu za prijenos električne energije će sadržavati, ali se neće ograničiti na sljedeće:

- odredbe koje će omogućiti ravnopravan pristup elektroprijenosnoj mreži za sve snabdjevače električnom energijom koji imaju fizički pristup sistemu,
- obavezu poštivanja važećih tarifa,
- obavezu poštivanja odredbi tehničkih standarda, komercijalnog koda i mrežnog kodeksa,
- obavezu planiranja proširenja sistema da bi se zadovoljile potrebe potrošača,
- obavezu poštivanja standarda kvaliteta za snabdijevanje električnom energijom, regulaciju napona i poboljšanje karakterističnih parametara kvaliteta usluga koje vlasnik licence pruža korisnicima sistema,
- tabelarni prikaz objekata vlasnika licence pomoću kojih obavlja licenciranu djelatnost,
- tabelarni prikaz objekata koji nisu u vlasništvu vlasnika licence, a koji su neophodni za obavljanje licencirane djelatnosti,
- ovlaštenje za obavljanje djelatnosti prijenosa električne energije i djelatnosti vezanih za prijenos na teritoriji BiH korištenjem objekata iz prethodnih tabelarnih prikaza,
- kriterije pod kojima vlasnik licence može obavljati djelatnosti prijenosa i djelatnosti vezanih za prijenos u susjednim elektroenergetskim mrežama,
- zabranu obavljanja aktivnosti proizvodnje, isporuke, trgovine ili distribucije električne energije, ili bilo koje djelatnosti koje su van djelokruga prijenosa ili djelatnosti vezanih za prijenos, bez izričitog odobrenja DERK-a, u skladu sa Zakonom o osnivanju prijenosa,
- obavezu da vlasnik licence vodi posebne račune za djelatnost prijenosa od drugih djelatnosti na način i u obimu specificiranim u uvjetima,
- obavezu da vlasnik licence ne vrši izmjene u mreži takve prirode koje utiču na kompatibilnost mreže sa proizvođačima, distributivnim i susjednim mrežama, kao i postrojenjima u vlasništvu trećih lica, na način da ugrožava bezbjednost i sigurnost snabdijevanja,
- obavezu vlasnika licence da u skladu sa mrežnim kodeksom rukovodi, održava (uključujući popravke i zamjene ako je potrebno) i štiti svoju mrežu kako bi obezbijedio adekvatan, ekonomičan, pouzdan i siguran prijenos električne energije,

- obavezu da usklađuje planiranje razvoja svoje mreže sa drugim mrežama i susjednim sistemima,
- obavezu da se postrojenja i vodovi projektuju, grade i koriste tako da efekat njihovog korištenja neće ugroziti zdravlje stanovništva odnosno područja, i koji će u najmanjoj mogućoj mjeri promijeniti prirodno okruženje i vrijednost pejzaža,
- obavezu poštivanja pravila ili standarda odobrenih od strane DERK-a koji se odnose na zonu bezbjednosti,
- obavezu da vodi odgovarajuće knjigovodstvo i priprema knjigovodstvo u skladu sa specificiranim principima, i
- odredbe koje zabranjuju napuštanje ili izmjenu licencirane aktivnosti ili bilo kojeg prijenosnog sredstva bez prethodnog odobrenja DERK-a.

b) Licence za aktivnosti nezavisnog operatera sistema

Pored sadržaja iz člana 26. ovog pravilnika, uvjeti za licencu za aktivnosti NOS-a će sadržavati, ali se neće ograničiti na sljedeće uvjete:

- odredbe koje će omogućiti ravnopravan pristup elektroprijenosnoj mreži za sve snabdjevače električnom energijom koji imaju fizički pristup sistemu,
- obavezu poštivanja važećih tarifa,
- obavezu poštivanja odredbi tehničkih standarda, komercijalnog koda i mrežnog kodeksa,
- obavezu planiranja proširenja sistema da bi se zadovoljile potrebe potrošača,
- standarde kvaliteta za snabdijevanje električnom energijom, održavanje frekvencije i regulaciju napona i poboljšanje karakterističnih parametara kvaliteta usluga koje vlasnik licence pruža korisnicima sistema,
- ovlaštenje za obavljanje djelatnosti nezavisnog operatera sistema za prijenosni sistem u BiH,
- zabranu obavljanja aktivnosti proizvodnje, snabdijevanja, trgovine ili distribucije električne energije, ili bilo koje druge aktivnosti koja nije odobrena Zakonom o osnivanju NOS-a,
- način obavljanja aktivnosti upravljanja sistemom prijenosa u svrhu obezbjeđenja pouzdanosti,
- način upravljanja sredstvima i uređajima u centralnom kontrolnom centru,
- način upravljanja balansnim tržištem,
- način pružanja sistemskih usluga i obezbjeđenja pomoćnih usluga,
- obavezu razvoja i primjene standarda pouzdanosti,
- obavezu razvoja i upravljanja pravilima koja regulišu korištenje prijenosnog sistema,
- obavezu razvoja i provođenja tržišnih pravila koja rukovode odredbama vezanim za systemske i pomoćne usluge nad prijenosnim sistemom,
- obavezu da svoje aktivnosti obavlja u najboljem interesu svih strana u elektroenergetskom sistemu, i
- obavezu da se konsultuje sa svim licenciranim proizvođačima i mrežnim operaterima kada uspostavlja ili mijenja operativne protokole i način dispečiranja ili odredbe o sigurnosti sistema.

c) Licence za međunarodnu trgovinu

Pored sadržaja iz člana 26. ovog pravilnika, uvjeti za licencu za međunarodnu trgovinu će sadržavati, ali se neće ograničiti na sljedeće uvjete:

- ovlaštenje za obavljanje međunarodne trgovine električnom energijom sa opisom transakcija koje je dozvoljeno vršiti,
- obavezu poštivanja komercijalnog koda, mrežnih pravila i tržišnih pravila,
- odredbe koje definišu odnose i obaveze prema NOS-u i Kompaniji za prijenos električne energije uključujući, ali ne ograničavajući se na dostavljanje podataka, dokumenata i drugih informacija,
- odredbe koje zahtijevaju periodično nadgledanje ili druge informacije po pitanju aktivnosti vlasnika licence u drugim jurisdikcijama,
- odredbe o zabrani zloupotrebe tržišne moći, i
- način obezbjeđenja garancija za sve transakcije koje obavlja.

Uvjeti uz sve tipove licenci će sadržavati i bilo koje druge uvjete za koje DERK smatra da su potrebni kako bi se osiguralo usaglašavanje sa ciljevima ili zahtjevima Zakona i propisa DERK-a.

VII PROMJENE STATUSA LICENCE

Član 28. ***Obnavljanje licence***

Ukoliko namjerava da nastavi obavljati licenciranu djelatnost, vlasnik licence je dužan da podnese zahtjev za obnovu licence najkasnije 180 dana prije isteka licence. Obnavljanje licence se vrši na isti način kao i dodjeljivanje licence.

DERK treba da donese odluku o obnovi licence u skladu sa odredbama ovog pravilnika i da odluku dostavi podnosiocu zahtjeva najkasnije 90 dana prije isteka prethodno izdate licence.

DERK može naložiti vlasniku licence da, uprkos isticanju roka važnosti licence, nastavi pružati usluge na privremenom osnovu, ako se za to pojavi potreba.

Član 29. ***Izmjene licence***

DERK može otvoriti proces redefiniranja ili izvršiti izmjenu licence po zahtjevu vlasnika licence ili, nakon što se vlasniku licence da razumna obavijest i mogućnost saslušanja, zbog potreba uzrokovanih jasnom i nepredvidivom promjenom okolnosti.

Vlasnik licence podnosi pisani zahtjev za izmjenu licence uz navođenje dijela licence koji želi da mijenja i novog predloženog teksta sa potkrijepljenim obrazloženjem.

U slučaju da DERK inicira izmjenu licence, vlasnik licence se obavještava pisanim putem o promjeni okolnosti, razlozima za donošenje izmjena i samim izmjenama licence. U obavještenju se navodi i pregled aktivnosti DERK-a u procesu izmjene licence.

Postupak za izmjenu licence vodi se na isti način kao i postupak za izdavanje licence.

Jasna i nepredvidiva promjena okolnosti iz stava 1. ovog člana uključuje, ali se ne ograničava na sljedeće:

- prestrukturiranje elektroenergetskog sektora,
- promjena pozicije i uloge vlasnika licence u regionalnim i međunarodnim okvirima,
- velike promjene u pravnom okviru, sudskim odlukama, događajima ili ugovorima koje bitno utiču na licencirane aktivnosti,
- promjene uvjeta koje imaju veliki utjecajem na obavljanje licencirane aktivnosti,
- finansijska nesolventnost ili bankrot,
- izmjene korporacijske strukture nosioca licence (razdvajanje, privatizacija),
- promjene koje utiču da ispunjavanje uvjeta iz licence postane nemoguće,
- višestruka neusklađenost sa postojećim uvjetima licence,
- višestruke žalbe korisnika usluge po pitanju performansi vlasnika licence,
- izmjena DERK-ove regulative, i
- zaštita javnog interesa.

U slučaju da su izmjene licence takvog obima da se suštinski mijenja sadržaj licence, DERK će obavijestiti korisnika licence da je potrebno da u postupku otvaranja procesa redefiniiranja licence podnese novi zahtjev za dodjelu licence.

Član 30.

Suspenzija ili ukidanje licence

DERK može da izvrši suspenziju licence na određen ili neodređen period, ili trajno ukinuti licencu u sljedećim slučajevima:

- a) ako vlasnik licence to zatraži, ili
- b) ako nakon rasprave, koja se odvija u skladu sa ovim pravilnikom i Poslovnikom o radu DERK-a, DERK utvrdi:
 - da se vlasnik licence ne pridržava uvjeta iz licence,
 - da vlasnik licence ne dostavlja podatke i informacije tražene od strane DERK-a, NOS-a, kompanije za prijenos električne energije ili Ministarstva vanjske trgovine i ekonomskih odnosa tokom trajanja licence,
 - da vlasnik licence namjerno dostavlja netačne podatke i informacije DERK-u, NOS-u, kompaniji za prijenos električne energije ili Ministarstvu vanjske trgovine i ekonomskih odnosa,
 - da vlasnik licence ne omogućava direktan pristup opremi, dokumentima ili drugim objektima koji su u vlasništvu ili su kontrolirani od strane vlasnika licence, ili se vlasnik licence ne pridržava uvjeta nadgledanja,
 - da je vlasnik licence neovlašteno prodao, dodijelio ili prenio licenciranu aktivnost trećoj strani bez prethodne saglasnosti DERK-a, i
 - da vlasnik licence ne plaća regulatornu naknadu u roku određenom od strane DERK-a.

DERK inicira proceduru za suspenziju licence dostavljanjem obavještenja vlasniku licence o pokretanju procedure za suspenziju licence sa pisanim obrazloženjem o razlozima pokretanja procedure.

Postupak za suspenziju licence vodi se na isti način kao i postupak za dodjeljivanje licence.

Ukoliko u toku postupka vlasnik licence ispuni zahtjevane uvjete, DERK može obustaviti postupak suspenzije.

Ukoliko DERK suspenduje licencu na određeni ili neodređeni period, i ako vlasnik licence ne ispoštuje zahtjeve DERK-a za prekid suspenzije, DERK može ukinuti licencu u roku od šest mjeseci od dana donošenja odluke o suspenziji licence.

Ukidanjem licence vlasnik licence gubi pravo da ponovo DERK-u podnese zahtjev za dodjelu bilo koje vrste licence u narednih deset godina.

Član 31. ***Prijenos ovlaštenja***

Nakon suspenzije ili ukidanja licence, DERK može ovlastiti drugog vlasnika licence, da obavlja djelatnost definiranu suspendovanom ili ukinutom licencom, uz korištenje objekata, instalacija i mreže prethodnog vlasnika licence.

Član 32. ***Prijenos licence***

Ako vlasnik licence želi prodati, dodijeliti, prenijeti, iznajmiti ili na drugi način izvršiti prijenos svoje licence, aktivnosti koje su predmet licence ili sredstva iz licence, mora za takav prijenos dobiti odobrenje DERK-a. Neovlaštena prodaja, dodjela ili transfer licencirane aktivnosti trećoj strani bez prethodnog odobrenja DERK-a će biti povod DERK-u za suspenziju postojeće licence.

Ukoliko je proces prijena licence odobren, vlasnik licence je dužan da nastavi sa izvršavanjem svojih obaveza u skladu sa uvjetima licence dok se procedura prijena ne okonča.

Novi vlasnik licence mora da ima odobrenje za prijenos licence izdato od DERK-a prije početka obavljanja djelatnosti.

Postupak prijena licence se vodi na isti način kao i postupak izdavanja licence. DERK će odlučiti da li je lice kome se licenca prenosi sposobno da zadovolji uvjete licence.

Period važenja, kao i sadržaj uvjeta licence će ostati nepromijenjeni.

VIII REGISTAR LICENCI

Član 33. ***Registar licenci***

DERK ima obavezu da vodi registar licenci.

U registar se unose sva dokumenta vezana za određenu licencu.

Dokumenti koji se moraju registrirati su:

- zahtjev za izdavanje licence,
- prilozi uz zahtjev,
- odluka kojom se potvrđuje kompletnost zahtjeva,
- dokumenti koji se odnose na javne rasprave,
- odluka o izdavanju ili odbijanju licence,
- licenca sa uvjetima za korištenje,

- odluka o izmjenama i dopunama, suspenziji ili ukidanju licence,
- odluka o prijenosu licence na drugo lice, i
- odluka o pružanju usluga na privremenoj osnovi iz člana 28. ovog pravilnika.

DERK će voditi i sažetak registra u elektronskoj formi, koji će se sastojati od sljedećih podataka:

- registarski broj licence,
- datum zavođenja u registar licenci,
- naziv vlasnika licence,
- mjesto i adresa vlasnika licence,
- datum izdavanja licence,
- datum isteka licence, i
- datum donošenja odluke o izmjenama, dopunama, suspenziji, ukidanju ili prijenosu licence.

Sažetak registra u elektronskoj formi iz prethodnog stava se objavljuje na web stranici DERK-a.

Registarski broj se dodjeljuje svakoj licenci izdatoj od strane DERK-a i sastoji se od:

- rednog broja pod kojim je zavedena u knjigu protokola DERK-a,
- broja dokumenta prema klasifikaciji, i
- godine.

Član 34.

Registar podnijetih zahtjeva

DERK sačinjava listu – registar svih podnijetih zahtjeva za dodjelu licence, koji su u postupku, a po kojima nije odlučivano, i procjenu potrebnog perioda za odlučivanje po svakom pojedinačnom zahtjevu. Lista omogućava DERK-u efikasniji postupak izdavanja licence i pruža informaciju zainteresiranim licima.

Lista podnijetih zahtjeva se objavljuje na web stranici DERK-a.

Član 35.

Sadržaj objave u službenim glasilima

Objave izdatih licenci vrše se u "Službenom glasniku BiH" i službenim glasilima entiteta.

DERK će za svaku izdatu licencu objaviti sljedeće:

- registarski broj licence,
- datum izdavanja licence i period za koji je licenca izdata,
- naziv i adresu vlasnika licence,
- opis djelatnosti za koju je licenca dodijeljena, i
- sažetak sadržaja licence.

IX NADGLEĐANJE

Član 36. ***Uvjeti nadgledanja***

DERK nadgleda obavljanje licencirane djelatnosti.

Vlasnik licence mora dostavljati DERK-u izvještaje navedene u uvjetima licence ili po zahtjevu DERK-a tokom perioda važenja licence.

DERK će vršiti najavljene i nenajavljene inspekcije objekata i dokumenata vezanih za licenciranu djelatnost.

DERK će nadgledati sve aspekte usklađenosti vlasnika licence sa uvjetima licence, kao i svim odredbama relevantnih zakona i propisa DERK-a.

DERK može pokrenuti hitni postupak u cilju reagiranja na sumnju o povredi obaveza iz licence koju je izdao, na vlastitu inicijativu ili kao odgovor na zahtjev bilo kojeg lica.

Član 37. ***Sankcije***

Ukoliko se vlasnik licence ne pridržava uvjeta iz licence ili Zakona, primijenit će se kaznene odredbe predviđene zakonom.

DERK može, ali neće biti obavezan, da vlasniku licence dostavi administrativna obavijest o povredi i da ga pozove na administrativno poravnanje povodom povrede dozvole od strane vlasnika iste, prije nego što se primijene kaznene odredbe.

Prije primjene ove mjere, u slučajevima kada to okolnosti dozvoljavaju, DERK će pismeno opomenuti vlasnika licence i odrediti rokove za otklanjanje nedostataka.

DERK prilikom sankcioniranja može primijeniti i odredbe člana 30. ovog pravilnika, tj. suspendovati ili ukinuti licencu.

X PRIJELAZNE I ZAVRŠNE ODREDBE

Član 38. ***Prijelazne odredbe***

Kako bi svoje aktivnosti provodio u skladu sa ovim pravilnikom, NOS će podnijeti zahtjev za izdavanje privremene licence za aktivnosti nezavisnog operatera sistema, ne kasnije od dana podnošenja zahtjeva za odobrenje početnih tarifa u skladu sa članom 42. Zakona o osnivanju NOS-a. DERK će izdati privremenu licencu, sa odgovarajućim uvjetima, u roku od 60 dana od dana podnošenja zahtjeva sa periodom važenja od maksimalno dvije godine.

NOS će podnijeti zahtjev za izdavanje licence u roku od šest mjeseci od dana registracije u skladu sa članom 45. Zakona o osnivanju NOS-a. Licenca, kada se izda, zamijenit će privremenu licencu.

Kako bi svoje aktivnosti provodila u skladu sa ovim pravilnikom, Kompanija za prijenos električne energije u BiH podnijet će zahtjev za prijenos privremene licence za obavljanje djelatnosti prijenosa električne energije od postojećih elektroprivrednih poduzeća, ne kasnije od dana podnošenja zahtjeva za odobrenje početnih tarifa u skladu sa članom 46. Zakona o osnivanju prijenosa. DERK će odluku o prijenosu privremene licence donijeti u roku od 60 dana od dana podnošenja zahtjeva.

DERK će prilagoditi uvjete privremene licence iz prethodnog stava i propisati period važenja privremene licence koji nije duži od 2 godine. Prijenosna kompanija će podnijeti zahtjev za izdavanje licence u roku od šest mjeseci od dana registracije u skladu sa članom 49. Zakona o osnivanju prijenosa. Licenca, kada se izda, zamijenit će privremenu licencu.

Kako bi svoje aktivnosti uskladila sa ovim pravilnikom, postojeća lica koja se bave međunarodnom trgovinom podnose zahtjev za izdavanje privremene licence u roku od maksimalno 60 dana od dana stupanja na snagu ovog pravilnika. Novoformirana lica za obavljanje djelatnosti međunarodne trgovine mogu podnositi zahtjev za izdavanje privremene licence od dana stupanja na snagu ovog pravilnika. DERK će izdati privremenu licencu, sa odgovarajućim uvjetima, u roku od 60 dana od dana podnošenja zahtjeva sa periodom važenja od maksimalno dvije godine.

Lica koja obavljaju aktivnost međunarodne trgovine podnose zahtjev za izdavanje licence ne kasnije od 180 dana prije isteka privremene licence ili od roka koji DERK propiše posebnom odlukom, a koja reflektuje stvaranje svih formalnih uvjeta za obavljanje djelatnosti.

Privremene licence iz ovog člana će sadržavati uvjete vezane za računovodstvo, monitoring, izvještavanje i druge uvjete neophodne da se prikupe podaci potrebni za konačnu odluku DERK-a o zahtjevu za izdavanje licence.

Privremene licence iz ovog člana DERK izdaje po skraćenom postupku.

Član 39. **Pravni lijek**

Odluke po pitanju izdavanja licence ili odbijanja zahtjeva u skladu sa članom 16. ovog pravilnika ili po pitanju obnove, izmjene, suspenzije, ukidanja ili prijenosa licence, smatraju se konačnim odlukama DERK-a.

Protiv ovih odluka moguće je podnijeti tužbu Sudu Bosne i Hercegovine u roku od 60 dana od dana dostave odluke.

Prethodne preliminarne proceduralne odluke DERK-a, voditelja postupka ili DERK-ovog osoblja se ne smatraju konačnim odlukama.

Član 40. **Tumačenje i drugi akti DERK-a**

DERK će obezbijediti tumačenje ovog pravilnika.

Ukoliko neko pitanje nije sadržano u ovom pravilniku, DERK će odlučiti o njegovom rješavanju u svakom konkretnom slučaju.

Član 41. **Stupanje na snagu**

Ovaj pravilnik stupa na snagu osmog dana od dana objavljivanja u "Službenom glasniku BiH".

Broj: 05-02-39/05
21. aprila 2005. godine
Tuzla

Predsjedavajući Komisije
Mirsad Salkić